

ՈՍՏԱՆԻԿ ԶԱՎԵՆԻ ՄԱՐՈՒԽՅԱՆ (Ծննդյան 75-ամյակի առթիվ)



Լրացավ հայկական ճարտարագիտական կրթության երախտավորներից մեկի՝ Հայաստանի, Ուկրաինայի և Միջազգային ճարտարագիտական ակադեմիաների իսկական անդամ, Հայաստանի ազգային պոլիտեխնիկական համալսարանի «Ջերմաէներգետիկա և շրջակա միջավայրի պաշտպանություն» ամբիոնի պրոֆեսոր, ՀԱՊՀ Միջուկային անվտանգության տա-

րածաշրջանային ուսումնավարժանքային կենտրոնի (ՄԱՏՈՒԿ) գիտական ղեկավար, ՀԱՊՀ պատվավոր պրոֆեսոր Ոստանիկ Զավենի Մարուխյանի ծննդյան 75-ամյակը:

Ոստանիկ Մարուխյանը ծնվել է 1946 թ. մարտի 4-ին Երևանում Հայաստանի հրատարակչական ասպարեզի հայտնի գործիչ Զավեն Մարուխյանի ընտանիքում: Գերազանցությամբ ավարտելով Երևանի Խ. Աբովյանի անվան դպրոցը՝ Ո. Մարուխյանը 1964 թվականին ընդունվել է Երևանի Կ. Մարքսի անվան պոլիտեխնիկական ինստիտուտի (ԵրՊԻ, հետագայում՝ ՀՊՀՀ, այժմ՝ ՀԱՊՀ) էլեկտրատեխնիկական ֆակուլտետը և մինչ այսօր իր ողջ գիտակցական կյանքն ու ստեղծագործական գործունեությունը շաղկապել հարազատ բուհի հետ:

«Ջերմային էլեկտրակայաններ և արդյունաբերական ջերմաէներգետիկա» ամբիոնի ասիստենտ Մարուխյանն այնուհետև անցել է բուհի դասախոսական տարակարգերի հաջորդական աստիճաններով՝ ավագ դասախոս, դոցենտ, ապա՝ պրոֆեսոր: Դասախոսական աշխատանքին զուգահեռ՝ բուհում վարել է ղեկավար պաշտոններ՝ 1983-1987 թթ. ՀՊՀՀ էներգետիկական ֆակուլտետի դեկանի տեղակալ, 1987-1990 թթ.՝ նույն ֆակուլտետի դեկան, 1990-1992 թթ.՝ ՀՊՀՀ ուսումնամեթոդական վարչության պետ, 1992-2003 թթ.՝ ուսումնամեթոդական աշխատանքների գծով պրոռեկտոր: Այդ ընթացքում համատեղությամբ ղեկավարել է «Ջերմային էլեկտրակայաններ և արդյունաբերական ջերմաէներգետիկա», ապա հասարակական կարգով՝ «Շրջակա միջավայրի ճարտարագիտական պաշտպանություն» ամբիոնների աշխատանքները: Նրա կառավարչական և հատկապես մասնագիտական ունակությունների վերելքին նպաստել են ինչպես բնատուր օժտվածությունը, համառ աշխատասիրությունն ու պատասխանատվության մեծ զգացումը, այնպես էլ փորձառությունն ու գործընկերային համագործակցությունը Բուդապեշտի

տեխնիկական համալսարանի (1978-79), Աթենքի տեխնիկական համալսարանի (1996), Փարիզի միջուկային տեխնոլոգիաների հետազոտական ինստիտուտի (1997), Լուդիգի համալսարանի (2001) իր բնագավառի մասնագետների հետ:

Ոստանիկ Մարուխյանը ճանաչված է նաև հանրապետությունում որպես գիտակրթական և հասարակական ասպարեզների գործիչ: Հայաստանում բարձրագույն կրթության բարեփոխումների ակտիվ նախաձեռնողներից է: 1999թ. որպես ՀՀ Կրթության և գիտության նախարարի առաջին տեղակալ՝ նրա անմիջական ղեկավարությամբ ու մասնակցությամբ մշակվել են ոլորտի նորմատիվ փաստաթղթերի փաթեթներ՝ ուղղված բարձրագույն մասնագիտական կրթության բազմաստիճան համակարգի ներդրման գործընթացի կազմակերպմանն ու կարգավորմանը: 2003-2006թթ. եղել է ՀՀ ԱԺ պատգամավոր, ԱԺ պետափրավական հարցերի մշտական և Եվրախնտեզրման հարցերի ժամանակավոր հանձնաժողովների, նաև Սահմանադրական բարեփոխումների նախագծի մշակման աշխատանքային խմբի անդամ, արժանապատվորեն է ներկայացրել ՀՀ խորհրդարանը եվրոպական տարբեր ֆորումներում:

Ո. Մարուխյանը երկու անգամ՝ 2006-2011թթ. և 2015-2020թթ., պաշտոնավարել է որպես Հայաստանի ազգային պոլիտեխնիկական համալսարանի ռեկտոր: Նրա ղեկավարության շրջաններում հատկանշական են Պոլիտեխնիկի ուսումնամեթոդական և գիտահետազոտական գործունեության կայուն զարգացումը, ստեղծագործական բարերար մթնոլորտի ապահովումը, տասնամյակների ընթացքում հաստատագրված պոլիտեխնիկական ավանդույթների պահպանումն ու զարգացումը:

Նրա ղեկավարության հատկապես վերջին 5 տարիներին Պոլիտեխնիկում ստեղծվեցին արդիական ուսումնահետազոտական սարքավորումներով կահավորված երկու գերազանցության կենտրոնները, անօդաչու սարքերի՝ տարածաշրջանում առայժմ միակ ուսումնահետազոտական ինքնատիպ կառույցը, հաջողությամբ ավարտվեց յուրօրինակ և թանկարժեք գիտահետազոտական սարքերով ու գործիքամիջոցներով հագեցած «Պոլիտեխնոպարկի» ձևավորման ծավալուն գործընթացը: Նոր որակ և բովանդակություն ստացավ հիմնական գործընկեր կազմակերպությունների հետ փոխշահավետ համագործակցությունը, որի արդյունքում իրողություն դարձավ ուսանողական համակազմի կրթաթոշակների՝ ուսումնառությունը խրախուսող աննախադեպ համակարգի ներդրումը: Իրականացվեցին ՀԱՊՀ Ստրատեգիական պլանով նախատեսված արմատական կառուցվածքային փոփոխությունները. ձևավորվեցին ներհամալսարանական կրթագիտական խոշոր միավորները՝ ինստիտուտները, վերակազմակերպվեցին մի շարք ամբիոնային միավորներ, առավել կոռ կազմակերպական ձևի անցան համալսարանական քոլեջը և ավագ դպրոցը, սկսեց գործել համալսարանի ընդունելության կազմակերպման շուրջտարյա կառուցվածքային ստորաբաժանումը: Կտրուկ

բարելավվեց համալսարանի ֆինանսական վիճակը, ինչը հնարավորություններ ընձեռեց լսարանային ֆոնդի վերանորոգման գործընթացի ծավալման, նյութատեխնիկական բազայի թարմացման և աշխատավարձի բարձրացման համար: Մեկնարկեց և առայսօր շարունակում է գործել առողջապահության ապահովագրման հույժ կարևոր համակարգը:

Մարուխյան-մասնագետի անմիջական ջանքերով Պոլիտեխնիկում ներդրվել է մասնագիտական նոր ուղղություն՝ «Շրջակա միջավայրի պաշտպանություն էներգետիկայի ճյուղում», և այսօր ՀԱՊՀ էներգետիկայի և էլեկտրատեխնիկայի ինստիտուտում նրա կողմից ղեկավարվող կրթական տարբեր ծրագրերով իրականացվում են գիտակրթական գործառնություններ և պետությունը տալիս ֆինանսավորմամբ գիտահետազոտական թեմաներ ու պայմանագրային աշխատանքներ: ԱՄՆ-ի էներգետիկայի դեպարտամենտի հետ Ո. Մարուխյանի նախաձեռնած համագործակցային փոխհարաբերությունները տվել են ցանկալի արդյունք. ստեղծվել է Հարավային Կովկասում Միջուկային անվտանգության տարածաշրջանային եզակի կենտրոն, որտեղ իրականացվող դասընթացներն ու վարժանքները, ներդրված արդիական սարքավորումների ու գործիքամիջոցների շնորհիվ, էապես բարելավել են մի քանի մասնագիտությունների գծով ուսումնառության կազմակերպման գործընթացը, նպաստել գիտամեթոդական և հետազոտական մշակումների ընդլայնմանը: Ո. Մարուխյանը մեծ հաջողությամբ ղեկավարում է նաև «Միջուկային էներգետիկա և կրիմինալիստիկա» բազային գիտահետազոտական լաբորատորիայի աշխատանքները:

Վաստակաշատ պրոֆեսորը թվով 150 գիտական աշխատանքների, այդ թվում՝ արժեքավոր մենագրությունների, դասագրքերի և ուսումնական ձեռնարկների հեղինակ ու համահեղինակ է: Պրոֆեսոր Մարուխյանը գիտական աստիճաններ շնորհող էներգետիկայի – 043 մասնագիտական խորհրդի նախագահն է: Նրա ղեկավարությամբ բազմաթիվ ուսանողներ և մագիստրանտներ հաջողությամբ կատարել և կատարում են գիտական աշխատանքներ, թեկնածուական ատենախոսություններ են պաշտպանել 13 ասպիրանտներ, ովքեր այսօր իրենց ներդրումն ունեն ինչպես համալսարանում, այնպես էլ ՀՀ էներգետիկայի ոլորտի կառավարման տարբեր կառույցներում: Պրոֆեսոր Մարուխյանի և նրա սաների գիտական հետաքրքրությունների բավականին լայն շրջանակը ներառում է ժամանակակից ՋԷԿ-երի և ԱԷԿ-ների ներկայանային և էներգահամակարգային աշխատանքային ռեժիմների լավարկման մեթոդների մշակումը և էլեկտրակայաններում տեխնիկական ջրամատակարարման՝ ջրախնայողական ու բնապահպանական տեսանկյունից անբասիր համակարգերի ներդրմանն առնչվող հիմնախնդիրների լուծման ուղիների փնտրտուքը:

Ո. Մարուխյանը «ՀԱՊՀ Լրաբեր» գիտական հոդվածների ժողովածուի խմբագրական խորհրդի նախագահն է, «ՀՀ ԳԱԱ և ՀԱՊՀ Տեղեկագրի տեխնիկական

գիտությունների սերիա» և «ՀԱՊՀ Բանբեր» գիտական հանդեսների խմբագրական խորհուրդների անդամ:

Մարդկային բարձր արժանիքներն են բնութագրում Մարուխյան-գործչին և Մարուխյան-մարդուն. գիտակրթական ասպարեզի առանցքային բոլոր հարցերում գրագիտությունն ու խորագիտակությունը, իր Ալմա մատերի և նրա ավանդույթների հանդեպ տիրոջ պատասխանատվության բարձր զգացումը, գործընկերների և ուսանողության նկատմամբ անաչառ, սրտացավ ու հավասարակշռված գործելակերպը բնորոշում են նրան՝ որպես համակողմանի կրթված, տասնամյակների իր բազմավաստակ գործունեությամբ իմաստնացած մտավորականի:

Ոստանիկ Մարուխյանի արժանիքները բարձր են գնահատվել ինչպես ՀՀ Կառավարության, այնպես էլ միջազգային և ՀՀ տարբեր կազմակերպությունների ու բուհերի կողմից: Ո. Մարուխյանի՝ գիտակրթական, ուսումնական կազմակերպչական, պետական-հասարակական ոլորտներում ունեցած պատկառելի վաստակը և հայանպաստ ու հայրենապաստ գործունեությունը նշանավորված են ՀՀ «Անանիա Շիրակացի», ԱՀ «Երախտագիտություն», «Վաչագան Բարեպաշտ» մեդալներով, ՀՀ Կրթության և գիտության նախարարության ոսկե հուշամեդալով, ՀՀ Պաշտպանության «Վազգեն Սարգսյան» և ՀՀ Արտակարգ իրավիճակների նախարարության «Համագործակցություն՝ հանուն փրկության» մեդալներով, ԱՀ «Մայրություն», ՀԿ «Մայրական երախտագիտություն», ԱՀ զոհված ազատամարտիկների հարազատների միության «Մայրական պատգամ» մեդալներով, Հայաստանի Ճարտարագիտական ակադեմիայի ոսկե և արծաթե մեդալներով, Միջազգային ինժեներական ակադեմիայի «Ինժեներական արիություն» և ոսկե մեդալներով, Ռուսաստանի ինժեներական ակադեմիայի «Ինժեներական փառք» մեդալով, ՌԴ Անվտանգության դաշնային ծառայության և ՀՀ Երկրապահների միության հոբելյանական մեդալներով, ՀՊՃՀ, ԵՊՀ, ՀՊՄՀ, ՀԱՊՀ ոսկե հուշամեդալներով և բազմաթիվ պատվոգրերով ու շնորհակալագրերով:

Կրթական-հասարակական ոլորտների բազմահմուտ գործիչը, իր բնագավառի ճանաչված գիտնականը և խորապես հայեցի նկարագրով օժտված մտավորականն այսօր էլ գիտամանկավարժական և կազմակերպչական ունակությունների բարձունքում է, անխոնջ եռանդով իր ավանդն է ներդնում Հայաստանում տեխնոլոգիական կրթության զարգացման գործին՝ ի շահ Հայաստանի ազգային պոլիտեխնիկական համալսարանի բարգավաճման:

ՀՀ ԳԱԱ և ՀԱՊՀ Տեղեկագրի տեխնիկական գիտությունների սերիայի խմբագրական խորհուրդը սիրով շնորհավորում է իր գործընկերոջը՝ պրոֆեսոր Ոստանիկ Մարուխյանին, ծննդյան տարեդարձի առթիվ և մաղթում առողջություն, գիտական նորանոր ձեռքբերումներ: